

Жақсыбай САМРАТ



АБЫЛАЙДЫҢ

АҚҮЙІ

ЖАҚСЫБАЙ САМРАТ

АБЫЛАЙДЫҢ АҚ ҮЙІ

Астана

2010 жыл

УДК 94 (574)
ББК 63.3 (5 Қаз)

САМРАТ ЖАҚСЫБАЙ. Абылайдың ақ үйі. Астана, 2010. – 160 б.

ISBN 978-601-254-090-1

Журналист – жазушы Жақсыбай Самраттың «Абылайдың ақ үйі» атты бұл кітабы зерттеу еңбегіне жатады. Автор қазіргі Петропавл қаласының аумағында Абылайдың үйі болғанын, ол үй күйіп кеткен соң орнына салынған ғимаратты халық «Абылайдың ақ үйі» атап кеткенін дәлелдеп шыққан. Қазір ол «Мәдени мұра» бағдарламасының шеңберінде қалпына келтірілді. Сонымен бірге еңбекте Абылай ханының қазақ ұлтының сақталып қалуындағы тендерессіз еңбегі, Петропавл қаласының салынуы мен өсүндегі қазактар үлесінің зорлығы түрлі дәйектермен өрнектелген.

Кітап тілі жеңіл, қызықты оқылады.

УДК 94 (574)
ББК 63.3 (5 Қаз)

ISBN 978-601-254-090-1

© Ж. Самрат, 2010

ТАНЫМДЫҚ ТАҒЫЛЫМЫ МОЛ ЕҢБЕК

Бұл еңбек Абылай ханның өмірі мен істерінің қазақ халқының тарихындағы орны толmas маңызын көрсете беру мақсатында жазылған екен. Белгілі тарихи құжаттар мен деректерге сүйене отырып автор Абылайдың халықаралық саясаттағы әрекеттеріне байланысты бұрынғы қалыптасқан пікірлерден өзге, жаңа тұжырымдарды да батыл айтқан. Әрине, оларды тереңірек зердеделей түсу қажеттігі айқын. Дегенмен мұндай жаңа идеялардың болғаны жөн және ондай ойлардың да өмір сұру қақы бар.

Еңбектің екінші бөлімінде қазіргі Қызылжар шаһары түрғанау мақты қазақтардың ежелден қоныстанғаны, қаланың салынуына, өсіп-өркендеуіне олардың тікелей қатысқаны тарихи деректерге сүйене отырып баяндалған. Шын мәнінде Қызылжар өнірін ерте заманнан бері қазіргі қазақтардың арғы ата-бабалары қоныстанып келген. Соның ішінде біздің дәүірімізге дейінгі (БДД) VII – IV ғасырларда Сібір мен Солтүстік Қазақстанда сак-скиф және сармат тайпаларының рулары ғұмыр кешкен. Өнірдегі этникалық өзгерістер БДД II ғасырда осы жерлерге гундердің (туркілердің аргы аталары) басып кіруімен басталып, халықтардың Ұлы көші-қонының түркілік кезеңіне дейін жалғасты. V-VII ғасырларда «қыпшақ» этномімі пайда болды. Олар да Орталық Қазақстан мен Батыс Сібір жазығына қоныстанды, ал XI ғасырдың сонына таман Ертістен Дунайға дейінгі ұлан-байтақ кеңістіктегі саяси басымдыққа ие болды. Монгол кезеңінен кейінгі Солтүстік Қазақстанның этникалық тарихы қазақ халқының қалыптасуымен аяқталды. Соның ішінде бұл аймақта Орта жұз құрамына енетін аргындар, керейлер

және басқа рулардың өкілдері тұрды. XV ғасырдың екінші жартысы мен XVI ғасырдың бірінші жартысында қазақ халқының негізін қураған этникалық топтардың мемлекетке бірігі оның шоғырлану үдерісінің аяқталуын жылдамдатты.

Автордың мәлімдеуінше және бұл тарихи факт – қазақ жерінің мал жайлымына, адам қонысына жарайтын отты, сулы өнірінің бос жатқан аумағы мүлде болмайтын, оның барлық пұшпағын иелері жылдың төрт мезгілінде бір келіп қоныстанып, шаруашылық талабына сәйкес бірін жайлау, бірін күзсу, бірін қыстау етіп жайлап кететін. Соның ішінде қазіргі Қызылжар қаласы түскен Есілдің жағасындағы малғада, адамға да жайлы, әрі ықтасын, әрі оты мен сұы мол өнірдің де бос жатпағаны белгілі. Осы жерге қорған салу үшін Ресей патшалылығының әкімгерлері Абылайдың келісімін алғаны да анық сияқты. «Алым алып жау жүртқа жерді беріп, Абылайға шықты ма екі мүйіз» деген жолдар тегін айтылмайды. Ал қаланың қорғаның ішінен емес, түбінде өскені, оған қазақ, бұқар, қоқан, татар сияқты мұсылман халықтары өкілдерінің тығыз қатысқаны да тарихтан белгілі. Әсірсе, қазақтың басқа мұсылман халықтарымен жұптасуынан өмірге келген «шалақазақ» атты ұрпақ өкілдерінің сіңірген енбегі зор. Осы фактілерге терең назар аударған автор көптеген қалаларды, мәдениет пен өркениет ошақтарын қазақ жеріне орыстар әкелді, солар салды деген кеңестік солақай идеологияның шовинистік бағытын әшкерелеген. Осы қатарда Абылайға салынған «қак үй» де қаланың өсіп-өркендеуінде қазақ халқы өкілдерінің қолтаңбасы барлығын айғақтайтын дәлел ретінде аталады. Оның қалай салынып, артынан қандай тағдыр кешкенін зерттеу жолында автор көп еңбектенгені үшінші тарауда молынан көрінеді.

Шын мәнінде Транссібір теміржолының бойында орналасуының арқасында Петропавлға батыстан көшірілген өзге халық өкілдері көп қоныстандырылды. Олардың көбі

﴿ Абылайдың ақ үйі ﴾

бұл қаланың тарихын білмейді, тек ұлыорыстық көзқарас тұрғысынан жазылған үшқары енбектермен ғана таныс болуы мүмкін. Сондықтан олардың арасында Петропавлды орыс қаласы деушілер көп. Қаланың қазакы «Қызылжар» атауын алуына да сондай көзқарастағылар қарсы шығуда. Ал мәселенің шынына келетін болсак, Иудеядан шыққан Петр мен Павел сияқты апостолдардың славяндарға, соның ішінде орыстарға да еш қатысы жоқ. Петрдің өзі Айса пайғамбардан бас тартқаны да белгілі. Ендеше кейбір орыс жерлестеріміздің жергілікті тарихқа, геосаясатқа еш қатысы жоқ Петр мен Павел (шын есімі Савел) есімдеріне байланып қалулары да дұрыс емес.

Жалпы бұл кітаптың танымдық, білімдік тұрғыдан берері ете мол, пайдалы еңбек деп есептеймін. Оны тарих пәніне қосымша ретінде сыныптан тыс окуға пайдалану - өлке тарихын ғана емес, қазақ даласының жалпы тарихын терендей білуге пайдасын көп тигізер еді.

**Бұркітбай АЯҒАН,
тарих ғылымдарының докторы, профессор**

АЛҒЫСӨЗ

Осы еңбекте Абылайға қазіргі Қызылжар қаласының аумағында үй салынуының және ханның атын атауға тиым салынған кеңестік идеологияның күш алған жылдарында оның ұмыттырылған тарихының қайтадан жаңғыртылуы жайлы сөз болады. Солақай саясаттың салдарынан ұзақ жылдар бойы Петропавл қаласы салынуының, оның өсүі мен өркендеуінің қазаққа ешқандай қатысы жоқтай, ал оның ішінде қазақтың ханына үй салыну мүлде абсурд сияқты көрсетілген біржақты, ұшқары ұстаным қалыптасып келді. Осы идеология миларын әбден торлап алған көпшілік «Абылайдың ақ үйінің» Қызылжар аумағында болғанының өзін аныз, ертегідей көріп, мысқылмен қарайтын.

Біз, шамамыз келгенінше осы пікірдің жалғандығын, Қызылжардың ежелден қазақ қонысы болғанын, оның аумағында қазақ ханының үйі де болғанын, тіпті оның орнына артынан салынған ғимаратты да халық «Абылайдың ақ үйі» деп атап кеткенін дәлелдеп шықтық. Сонымен қатар бұл кітапта Абылай ханның өз өміріне де тоқталып, оның тарих сахнасына қалай келгені мен сіңірген еңбегі туралы да айттылған. XVIII ғасырда әркімнің жетегінде кетіп, жер бетінен халық ретінде жойыла жаздаған қазақты аман алып қалған бір шоғыр ғана атақты ерлер еді. Солардың ішінде де Абылай ханның еңбегі ерекше зор болғанын бәріміз бүтін білеміз. Сондықтан «үй» туралы әңгіменің өзін ханның өз тарихынан бастауды жөн көрдік.

Кеңестік тарихшылар колониалистік өкіметтің іс-қағаздарындағы жазба-сызбаларға, сонымен бірге дүниенің бәрін патша әкімшілігінің мүддесінен бағалап, соның көзімен барлап кеткен «арнайы» галымдар ментыншы, жансыздардың

﴿ Абылайдың ақ үйі ﴾

жазбаларына ғана сүйенетін. Қазақ тарихшыларының ауызша айтылған немесе араб графикасымен жазылған деректері көбінесе көзге де ілінген жоқ. Сондықтан кеңестік Қазақ тарихы барынша бұрмаланған, біржақты болатын. Ал біз ез еңбегімізді екіжақтың да деректерін салғастыра отырып жазған болдық. Оның әділ бағасын ақ жүректі адаптацияның берер деген үміттеміз.


Автор.

I БӨЛІМ

*«Сол күнде ел қорғаган Абылайдың
Кылсаң да аз қанша тәуәп моласына...»*

Мағжан

Қазақ даласының XVIII ғасырдағы тарихын қараң, сол кездегі ахуалға көз салсақ ол кілең шапқыншылық аренасы сияқты. Әсіресе, сол ғасырдың алғашқы 30 жылдығында кең даланың барлық бұрышындағы қырғын, қантөгіс, кілең қайғы мен мұн, жылау мен за-рлау адамның төбе құйқасын шымырлатып, жүргегіне салмақ түсіреді. 1723 жылғы құба қалмақтың шапқының қазақ «Ақтабан шұбырынды, алқакөл сұлама» деп ата-ды. Кейір дөректерге қарағанда осы шапқыншылықта қазақтың жартысынан көбі қырылып кеткен. Қожаберген жыраудың мұнды зары күні бүгінге дейін адамның жан-жүйесін босататын атақты «Елім-ай» жыры да сол кезде дүниеге келген. Елінен, туған жерінен айрылып, ел қорғайтын азаматтары мен басшылары қырылып, жалаңаш табандарымен ақ шаңды бұрқыратып, үдерे көшкен бейбіт халықтың жауға қарсы тұрар шамасы болмады. Қалмақтың шағын топтарының өзі олардың еркек кіндіктісін сұлатып салып, әйелдері мен қыздарын олжалап, мал-мұлкін талап кете берген. Шығыстан шапқан жоңғарлардан күйзелген елге батыстан Еділ қалмақтары (торғауыттар), Жайықтың казак-орыстары, Орал башқұрттары (естектер), Онтүстікten Қокан бектері, Бұқар мен Хиуа хандары да толассыз шабуыл-дап, қайта-қайта басып кіріп, ауылдарын шауып, мал-мұлкін талап, жандарын қырып отырған. Діні бір, тілі бір дейтін сонғылардың қазақтарға жасаған бір мазагы

 Абылайдың ақ үйі 
әсіресе естен кетпейді. Қазақ ауылдарына баса-көктеп кіретін қоқанның шеріктері тұрлі салықтың есебіне деп мал-мұлкін тартып алғанымен қоймай балиғатқа толмаған жас қыздарының төсін басып көріп, «жұмсақ болғаны үшін» деп те салық салған екен... Міне, осындаі қорлықтарды да қазақ бастан кешкен...

Ал сол жылдарда құлдық пен құндікке әкеткен жандарда қисап жоқ. Алып кетті, тартып кетті деп аттандаган айғай мен ойбай даланың ажырамас күйі болды. Шоқан Ұәлиханов ол жылдарды «было ужасным временем в жизни казахского народа» деп жазды. Кеңестік идеология көлденеңді құр жібермей, ұлттық дүниелерді жоқтауға қатаң бақылау орнатып отырған кездің өзінде қазақтың ата тарихын тереңнен қозғап, осы тақырыпқа жалғыз өзі ондаған том кітаптар жазған ғұлама жаушы Илияс Есенберлин: «Қазақ елі бұл кезде көкпарға тартуға дайындалған серке тәрізді еді. Жан-жағынан анталаған қай жауының тақымында кетеді? Әлде өзара қырылысқан хан, сұлтандар қанын сорғалатып, біреуі – аяғын, біреуі – қолын, біреуі – басын қанжығаларына байлап әкете ме, кім білсін?» деп жазған.

Осылай қырғынға ұшырай берудің негізгі кесірі – елді біртұтас қылып біріктіріп, күшті бір арнаға тоғыстырып ұстай алмаған басшылықтың болмағанынан еді. Әз Тәуке хан өлгеннен кейін үш жұздің басы бірікпей, әрқайсы өз алдына түйе айдал кетті. Бәрін біріктіретін мықты тұлға, көреген қайраткер шықпады. Халық өздерін жауға қарсы жұмылдыра алмай, бас-басына хан болғысы келген төре тұқымына сенімсіздікпен қарай бастады. Сол кезеңнің қарсанында көз жұмған Әйтеке би өлерінің алдында «хан, сұлтан, төрелердің күні өткенін, олардың

ақыл-айласы алысқа апармайтынын» айтып кеткен екен. Қазақтың үш данасының бірі Төле би де:

Мен боламын дегендер
Ақтамады сенімді.
Көкірек қаққан хандарым
Лауазымға таласып,
Быт-шыт қылды елімді.
Береке-бітім іздеген
Таба алмадым бегімді.
Алауыз болып ағайын
Аз дұшпаннан женіліп,
Айтып-айтпай не керек –
Қайыстырды белімді, – деген екен.

Тәуkenің орнына хан болып сайланған оның ұлы Болаттың билер мен сұлтандар арасында да, халық арасында да еш беделі болмады. Сол кездердегі сардар, әрі аузына елді қаратқан шешен, жыршы Қожаберген жырау оны: «Хан деуге аузың бармайды, Тәуkenің ұлы Болатты. Неге десең ол сұлтан, Өзбекше тілді қалапты» деп шенеген. Тағы бір жырында сол жырау:

Төрелер Эз Тәукедей бола алмады,
Оларға қазақ көңілі тола алмады.
Батыр, Болат, Сәмекелер дәрменсіз бол
Кері кеткен елдің жәйі оңалмады, – деп жазды.

Ал бұл кезде қазақтың ата жауы құба қалмақтар болса өздерінің ішіндегі қайшылықтарын реттеп, орыс патшалығымен жақсы қатынастар орнатып, олар-

дан отты қару алуға қол жеткізген. Академик Манаш Қозыбаевтың жазғанына қарағанда 1715 жылы орыстарда тұтқында жүрген швед шебері Ренатты да сатып алғып, оған зенбірек құйғызыған. Сөйтіп, Севан Рабтан бастаған жонғар әскері қазақ жеріне басып кіргенде зенбірек сүйретіп еніп, саны да, қару-жарагы да қазақтардан басым болған. Қожаберген жырау өзінің «Елім-ай» дастанында:

Орыс, Қытай көршіміз,
Ойраттарды жақтаған.
Мылтық алғып солардан
Жорыққа қалмақ аттанған.
Мұсылманды қырғанға
Халқи-Жонғар шаттанған.
Қонысынан айрылып
Халқым болды-ау ақтабан.
Қанға құмар торғауыт
Дәу мылтықты сүйретті.
Үсті-үстіне доп атып,
Даламды тегіс күнірентті, – деп жазды.

Жырау өзінің осы дастанында қазақтың мылтық таба алмай сандалғанын да жазады:

Хиуа, Бұхар, Қоқан да
Қазақтарға қатайды.
Бізден барған елшіге
Мылтық сатпай шалқайды, – дейді ол.

Айта кететін жәйт, қазақтың аса ірі тарихшысы, академик Манаш Қозыбаев Қожабергеннің осы «Елім-ай» дастанын жоғары бағалап, оны «ұлттымыздың Илиада

мен Одиссеядай эпикалық өміршөң трагедиясы» деп жазды. Сонымен қатар ол осы дастанның иесі Қожабергенді «дүлділ тарихшы» деп бағалап, оның шығармасында «бүкіл дәуір суреттегіледі» деп атаған.

Қазақтың өз тарихындағы ұлы қырғынға ұшырауларының басы жонғардың шабуылынан басталып еді. Енді жонғардың сол шабуылдарын тоқтатып, қазақ халқын толық жойылып кетуден аман сақтап қалған ерлер жайына келейік.

Сол кездерде ұшы-қиырсыз кен, сары даладан «сайғақ құрлыш пана таптай» босып, «шілдің боғындаш шашырай» шұбырыған елді тоқтатып, басын қосып, жауға қарсы қол жинай білген ерлердің енбегі орасан зор екенін бүтін біліп отырмыз. Қазақ халқын ұлт ретінде қырылып кетуден солар сақтап қалды. Қанжығалы Бөгенбай, Қаракерей Қабанбай, Саурық, Шақшақ Жәнібек пен Керей Жәнібек, Бәсентиін Малайсары батырлар, Төле, Қаздауысты Қазыбек, Әйтеке, Ақсұат билер мен Әбілқайыр сұлтан бастаған ерлер елді ұйымдастырып, жауға қарсы алғашқы соққыны 1727 жылы Ұланты мен Бөленті өзендерінің жағасында берді. Осы жылы Қаратауды да жаудан босатты. Хан тауында Орда тігіп, үш жүздің қолын біріктірді. Жалпы, жонғарларға қарсы Отан соғысында аты шыққан батырлар өте көп. Соның ішінде Бұқар жырау жоғарыда аты аталғандардан басқа Сіргелі қара Тілеуке, Қарақалпақ Қылышбек, Тіге Сатай мен Бөлек, Шапырашты Наурызбай, Қаумен Дәulet, Сенгібай мен Шойбек, Керей Жабай, Уақ Сары мен Баян және т.б атайды. Көптеген жырларда бұлардан басқа Қыпшақ Қошқарбай, Қонырат Барақ пен Көбек, Айдабол Толыбай, Қаракесек Жарылғап, Атығай-Қарауылдан Жәпек,

Керей Тұрсынбай, Таракты Наймантай мен Байқозы, Тама Есет, Табын Бекенбай, Кете Арас, Жаныс Шақан, Албан Райымбек, Шапырашты Қарасай батырдың баласы Жарылғап және т.б есімдері бар.

1729 жылы (кейбір деректерде 1730) қазақ қолы Аңырақай даласында Ұлы жеңіске жетті. Ол кезде Іленің тау ішімен ағатын жартысын Қыспағай, даламен ағатын ағысын Аңырақай деп атаған еken. Сұрапыл ұрыс осы Аңырақайды болған. Түбөгейлі жеңіс болмаса да қазақты жер бетінен жойылып кетуден сақтап қалудың басы болған осы ұлы шайқас туралы толығырақ айта кетелік.

Аңырақай шайқасының аумағы солтүстікте Балқаш, оңтүстікте Отар даласы, Батысында Шу, Шығысында Құртіге дейінгі аралықты қамтып, ұзындығы 30-35, ені 20 шақырымды, яғни жалпы ауданы 700 шаршы шақырымдай жерді алған. Балқаш көлінен оңтүстікке қарай 120 шақырым жерде Итішпестің Алакөлі деген көл бар, қазір ол Сорқұдық деп аталады. Осы өнір Аңырақай даласы деп аталған. Бұл таулы, жыралы, көп қорымды жерлер. Шайқас Итішпестің Алакөлінің жағасында басталған.

Қазақстандағы ең үлкен көлдердің бірі Балқаштың өзі Алматы, Жамбыл, Қарағанды облыстарының шегіне жайылып жатыр ғой. Соның ішінде Аңырақай шайқасы Балқаштың қазіргі Алматы облысының аумағына қарайтын шегінде болған. Көптеген мәліметтерге қарағанда ол көктемде басталып, 40-45 күнге дейін созылған. Болжам бойынша бұл соғысқа қазақ жағы 35 мындар, жонғар жағы 40 мындар әскер шығарған. Ол кезде Ұлы жүздің ханы Жолбарыс, Орта жүздің ханы Сәмеке, Кіші жүздің ханы Әбілқайыр. Ал Үш жүздің ханы

Тәуке ханның баласы Болат еді. Осы хандар және Төле, Қазыбек пен Ақсұат (Әйтеке бұл жылдары жоқ, ол 1700-ші жылы қайтыс болған) билер, батырлар мен сұлтандар қатысқан Ордабасыдағы үлкен жыныда үш жүздің қолына Бас қолбасшы болып Әбілқайыр хан сайланған. Жолбарыс пен Сәмеке жонғардың шапқыншылығына көп ұшыраған жүздердің ханы болғанда Кіші жүз халқы қырғыннан біршама аман қалып еді. Бірақ соған қарамай көп қолмен келген, әрі сол кезде ана екеуіне қарағанда әскери дарыны артығырақ болған соң Ордабасы кеңесі аузы үәлі билердің айтуымен Әбілқайырды Бас қолбасшылыққа сайлайды. Жиынға қатысушы батырлар мен әскербасылар Бас қолбасшыға бағынып, өз қимылдарын үйлестіріп отыруға, жауға біріккен майдан құрып аттануға ант береді. Әбілқайыр да азаттық қүресін басқарып, елді жаудан толық босатқанша қолбасшы болып, аттан түспеуге серттеседі.

Шайқас бірден қатты басталмай, өз күштерін сынау тәсілімен жүргізілген. Екі жақ та өнірдің таулы, жыралы бедерлерін өз мақсаттарына ұтымды пайдаланып қалтуға тырысқан. Қазақтар арасында ежелден келе жатқан «Ай қораланды», «Құйрық жеу», «Ашамай» деген секілді соғыс тәсілдері бұл шайқаста кеңінен қолданылады. Айта кететін жәйт, жонғарларда зенбірекпен қатар мылтық та болған. От қарудың қылыш-найзага қарағанда көп артық екені белгілі. Гұрс етіп атылғанының өзі ен далада жабайы бол өскен қазақтардың аттарын қатты үркітіп, ұрыс даласынан ала қашқан. Қолдары қылыш пен қалқанында болған сарбаз атының басын түзете алмай, екпінімен етіп кетіп немесе құлап қалып, қылышын ойдағыдай сілтей алмай, найзасын құшырлана қадай алмай, шокпарын

қолы сүйсініп ұра алмай өз бармағын өзі шайнап жатқан кезін де көзге елестету қыын емес. Зенбіректің гұрс еткен даусымен бірге жарқ етіп жарылған добы да ныса-насына іліккен жанды жоқ қылып жатқанын көргенде жүрек шайлығып қалатыны рас қой. Осының бәрі от қаруды бұрын көрмеген жауынгерді қандай қайсар болса да психологиялық тұрғыдан қатты әлсіреткен. Бірақ... қазактар оңай шағылатын жаңғақ емес-тін. Қарындасын күң қылып, қатын-баласын құл қылып, елін аздырып, жұртын тоздырып, жерін шауып, халқын жойып әбден ығыр қылып, ызасы өткен қалмакқа қандай қаруы болса да бір қарсы тұруды армандаپ жүрген ержүрек жауынгерлер батырлар мен сардарлардың бастауымен арыстанша арпалысып, қайтпай шайқасады.

Ашынған қазақ қорқып бұға алмады,
 Қалмақтар жекпе-жекке шыға алмады.
 Мылтығы жеткілікті қанішерлер
 Бірме-бір шайқасуды қаламады.
 Лап қойған бетте Қазак бұзып шықты,
 Қалмақты қоршап тұрған шаншып жықты.
 Қайсыбір жас өндірлер оққа ұшса да
 Қайтпасын біздің жақтын жау да ұқты, – деп
 жазды Қожаберген.

Сейтіп, қазақ қосындарын бастап жауға кірген Ұлы жүзден шыққан Сиқым Қарабатыр, Жаныс Өтеген, Ботбай Сәмен, Шымыр Қойгелді, Ошақты Саңырақ, Ысты Төлек, Шапырашты Наурызбай, Албан Ханкелді, Орта жүзден Қанжығалы Бөгөнбай, Қаракерей Қабанбай, Шақшақ Жәнібек, Керей Жәнібек, Қыпшақ Тілеулі, Абақ керей Жауғашар, Кіші жүзден Тама Есет, Шек-

ті Тайлақ т.б. батырлар бастаған қазақ қолдары тізе қоса қымылдағанда жауға қарсы жолбарыстай жойқын қайрат көрсетіп, қатты тиеді. Қазақтың алапат күшіне шыдамаған жонғар қолы сөгіліп, қаша бастайды. Ошақты Саурық батыр бастаған қазақ мергендерінің қолы да ерен ерлік көрсетіп, қашқан жауды сұр жебенің астына алады. Сөйтіп, жонғардың қалың қолы осы жолы үлкен женіліске ұшырайды. Есін жия алмаған олар Итішпестің Алакөлінде сортаң судан тағы да шөлге ұшырап, одан әрі соғысуға шамалары болмай, Аягөз, Шарға қарай жөңкіле қашады.

Осы бетпен жауды қуа берсе қазақ қолы түпкілікті женіске жетер еді. Бірақ қай күнгі алауыздық, таққа таласқан биліккүмарлық қазақ хандарының басын одан әрі біріктіре алмайды. Аңырақай шайқасының соңғы жағында Болат хан жарапанып қайтыс болған соң үш жүздің ханы болмақ үшін таққа талас басталады. Осы жолы бар қазақтың қолына Бас қолбасшы болып сайланған Кіші жүздің ханы Әбілқайыр Ұлы хан болуды армандаиды. Бірақ кімнің өресі қандай екенін көріп тұрған билер кеңесі оны да, Орта жүздің ханы - Болат ханының інісі Сәмекені де үш жүздің ханы, яғни Ұлы хан етіп сайламай, таққа Болаттың баласы Әбілмәмбетті отырғызады. Бұған наразы болған Әбілқайыр берген сертін аттап, майдан даласын тастап, Кіші жүз қолын Ыргыз арқылы батысқа алып кетеді. Таққа өкпелегендердің бірі - Орта жүздің ханы Сәмеке де өз ұлысының көп бөлігін елдің солтүстігіне қарай көшіріп әкетеді. Сөйтіп, кешегі қаптаған қазақ қолының ұрыс даласында жартысы ғана қалады. Бірақ соның өзінде Аңырақай шайқасы қазақтардың рухын көтеріп, жауынгерлік құлшынысын

арттырды. Елді ерлікке үндең, ертеңгі күнге деген сенімін молайтты. Жауды қирата женуге болатынын көрген сон елдің еңсесі көтеріліп, мерейі тасыды.

Қазақ елінің Ұлы Отан соғысындағы алғашқы бетбұрысы осылай болып, жауды күйрете женген Аңырақай шайқасы қазақ тарихында алтын әрітермен жазылды. Қазақ энциклопедиясы оның маңызын орыстардың Бородино даласындағы, Еуропаның біріккен қолының Ватерлоо, КСРО халықтарының Ұлы Отан соғысындағы Сталинград түбіндегі жеңістерімен бірдей деп баға берді.

1998 жылы Алматы облысының әкімдігі Аңырақай шайқасы болған жерлерге дала экспедициясын ұйымдастырды. Оның басшылары: сол кездегі Мемлекеттік хатшы Әбіш Кекілбайұлы мен академик Манаш Қозыбаев болды. Экспедиция жұмысының нәтижесіне қарағанда Аңырақай шайқасының жыр-дастандарда, тарихи деректерде айтылатын мағлұматтарының барлығы да сол жердегі атаулармен, тәбе, адырлармен дәл екендігі дәлелденді. Сөйтіп, жонғарларды жену құрметіне осы жерде алып ескерткіш орнатылды. Ал Ордабасыда қазақ халқының тәуелсіздігі мен бостандығы үшін айрықша еңбек сіңірген атақты үш биге ескерткіш орнатылды.

Ел басқарушы хандарымыздың бастары бірікпей, бірлесе жасаған бір қимылға ғана шыдап, артынан алауыз болып, жерді жаудан толық босатпай жатып, халқын қансыратпаса да қара жамылған шағында таққа таласып, қара бастарының қамын күйттеп кеткен шакта тарих сахнасына **Абылай** бейнесі шықты.

* * *

Аңырақай шайқасынан кейін бел алған қазақ жасақтары тұтастығынан ажырап қалса да шағын айқастарда жауға дүркін-дүркін, толассыз соққы беріп, оның күшін азайтып, әлсіретуге тырысты. Соның ішінде Қаракерей Қабанбай, Жанатай, Мүйізді Өтеген, Ер Жәнібек, Қанжығалы Бөгөнбай батырлар бастаған қолдар жонғарларға қарсы түйдек-түйдек женісті жорыктар жасады. Бұл кездегі ұлы хан Әбілмәмбет те сол кезде бір үлкен шайқасты ұйымдастырып, жонғар қолымен бет-п-бет келеді. Жазушы әрі тарихшы Мұхтар Мағауиннің айтуына қарағанда бұл 1733 жылы болған ойраттарға (жонғар хандығын құрайтын тайпалар одағы) қарсы шайқас екен. Осы айқаста Абылай есімі халыққа алғашқы рет танылды. Жонғардың сол жолғы бас батыры Шарышпен жекпе-жекке қазақ жағынан батыр шыға қоймаған тұста ешкімге белгісіз, ерен тұлғалы, қапсағай бойлы, екі көзі тостағандай, жанары болат қалқанды тесіп жіберердей өткір, ірі жігіт қолбасшы – Қанжығалы Бөгөнбай батырдың батасын алып, жауға қарсы атылады. Өзін жас деп менсіне қоймаған жонғардың бас батырын шаншып түсіріп, женіске жеткен ол қазақ қолына «Абылайлап» қайрат беріп, ұрандата шапқан күйі жалғыз өзі жаудың қалың қолына ұмтылады. Оның женісіне рухтанған қазақ қолы да «абылайлап» қосыла ұрандатып, жігіттің сонынан шауып, осы жолы да жауға жойқын соққы береді.

«Жиырмаға жасың толғанда,
Қалмақпен соғыс болғанда,
Алғашқы бақыт тапқанда –

Шарыштың басын қаққанда
 Қанжығаға бас байлап,
 Жау қашты деп айғайлап,
 «Абылайлап» шапқанда,
 Сол ерлікпен хан болдың
 Барша әлемге даң болдың, - деп жыр
 арнаған артынан оған замандасы Үмбетей жырау.

Сөйтіп, осы жолғы шайқаста да қазақ қолы тағы бір та-
 маша жеңіске жетеді. Бұл туралы қазақ жыршыларының
 бәрінің де шығармаларында бар.

Енді жауға қарсы «абылайлап» шапқан жігіттің кім
 екеніне келелік. Бұл жігіттің есімі **Әбілмансұр** еді. Ол
 туысы хан тұқымынан болса да қорлық пен зорлықты,
 аштық пен азапты басынан бір кісідей кешкен жан бола-
 тын. Сондықтан оны хан-сұлтандардың мәпелеп есіріп,
 үкілеп, тұмар тағып әкеліп таққа отырғызған бағлан ба-
 ласы деп айта алмайсың. Бұқар жырау бір өлеңінде: «Ай,
 Абылай, Абылай! Сені мен алғаш көргенде, Тұрымтайдай
 ұл едің, Түркістанда жүр едің, Әбілмәмбет патшага
 Қызметші болып тұр едің» деп оның қызын күндерін еске
 салады. Сондықтан да Абылайды өз есімін ел рухының
 бостандығы, басының азаттығы, жаттан тәуелсіздігі
 жолындағы күресте төккен қанымен, аққан терімен ар-
 палыс үстінде шығарған жан деп білген дұрыс.

Әбілмансұр қазақтың ұлы хандарының тікелей
 үрпағы. Оның арғы бабасы Қазақ ордасының негізін
 салған Әз-Жәнібек хан болатын. Одан Еңсегей бой-
 лы Ер Есім, одан Салқам Жәңгір, одан Тәуке хан мен
 Абылайдың арғы атасы Уәлибақы туады. Жәңгір хан
 өлгенде хандыққа Тәуке отырады. Уәлибақы жасы

үлкен болса да өзіне тақ бұйырмағанына өкпелеп, сол кезде Үргенішті (бұрынғы Хорезм патшалығының астанасы) билеп отырған нағашысы Қайып ханның қарамағына көшіп кетеді. Тағдырдың жазуымен ол сол жақта ұзақ жылдар тұрып қалады. Уәлибақының жекпе-жекке шыққанда жауларын шақ келтірмейтін Абылай есімді батыр баласы болады. Ол жауынгерлік батырлығымен қоса жауына қатал, кейде асқан қатігез, сонымен бірге әділ жан болған екен. Қолға түскен дұшпанның аяр қылышын білсе ол аямай, тегіс бастарын шабатын болса керек. Сол себепті халық оны «қапиsher Абылай» деп атап кеткен екен. 17-ші ғасырдың басында ол Сауран мен Түркістанды билеген. Осы Абылайдан Көркемәлі, одан Әбілмансұр туады.

Үргеніште Әбілмансұр жақсы білім алғып, зерек те, ерек көңілмен өсіп келе жатады. Бірақ бұл жерде де төрелер арасында алауыздық болып, өзара қырқысқан ағайындары әкесін өлтіріп, ол жетім қалады. Әкенің жаулары мұны да өлтірмек болғанда оның сенімді жігіті Оразқұл Әбілмансұрды қаладан жасырын алғып шығып, қашырып жібереді. Арып-ашып, айлар бойы қызын сапарларды бастан өткізіп, Әбілмансұр ақыры қазақтар қосынына жетеді. Бірақ мұнда қорқып қалған ол қауіпсіздік үшін өзінің шыққан тегін, сұлтанның баласы екенін ешкімге айтпай, қатты жасырып жүреді. Ақылды бозбала бір мықтының ығында болуды қаласа керек, біраз уақыт Түркістан қаласында қызметте болып, одан Үйсін Төле бидің қолына келіп, оның түйесін бағуға жалданады. Аты-жөнін айтпаған соң өсіп кеткен шашына қарап би оған «Сабалак» деп ат береді. Бірақ

оның қырағы көзі бозбаланың осал адам емес екенін бірден аңғарып қалады. «Төле бидің тарихы» деген бір дастанда ол өзінің отбасына:

«Мына бала көрерсін,
Бір жылы болар хақында.
Нұқыл болат денесі,

Адамның болар төресі...» деген екен.

Қазақтың әңгіме-жырларында, азыз-дастандарында Төле би мен Сабалақтың арасы, бидің оны түрлі жолмен сынауы туралы әңгімелер мен аңыздар өте көп. Эрине, ауыздан-ауызға тараған болған соң олардың қоспасы да, адам айтса нанғысыз сенімсіз жерлері де, анайы тұстары да жоқ емес. Бірақ, әйтеуір, қырағы көзді дана би Сабалақтың жай адам емес екенін бірден танып қалғаны рас болса керек...

Көптеген жырларда Әбілмансұр Төле бидің қосынымен келіп, Аңырақай шайқасына да қатысты дегенді. Бірақ мұның қисынсыз жері көп. Алдымен, 1729 жылы болған Аңырақай шайқасында Абылай әлі 16 жастағы бала (туган жылы 1713 жыл деп алғанда), тіпті 1711 жылы туғанның өзінде 18 жастағы бозбалағана. Мұндай кезінде жаудың бас батырын жеңе қою оңай болмас. Екіншіден, Әбілмансұрды Шарышты өлтірген шайқаста жоғары бағалап, қасына шақырған Әбілмәмбет хан. Ал Әбілмәмбет Аңырақай шайқасында әлі ұлы хан емес, екінші қатардағы сұltанғана болатын. Онда Орта жүздің ханы Сәмеке, ал ұлы хан Әбілмәмбеттің әкесі Болат еді. Әбілмәмбеттің ұлы хан болып сайланғаны осы Аңырақай шайқасының аяғындағана болғанын жоғарыда айттық. Ендеше, Абылайдың Аңырақайдың талылуы мүмкін емес.

Ал енді біз жоғарыда айтқан, Анырақай шайқасынан көп кейінгі бір айқаста қазақ қосының Әбілмәмбет бастап келіп, сол шайқаста Абылайдың ерлік көрсетіп, Шарыштыженуі барлық белгілі деректермен, ақын-жыраулардың шығармаларымен дәлелденеді. Әбілмәмбет орасан ерлік көрсеткен жас жігітті қасына шақырып, оның бар сырын сұрап, өзінің жақын туысы екенін біледі. Неме-ре ағасы Абылайдың атын ұран қылған оның үрпағына ризашылығын білдіріп, өзінің де ендігі жерде атасы Абылайдың атын алуын қалайды. Хан жарлығы екі емес, сол кезден бастап халық Әбілмансұрды «Абылай» атап кетеді. Хан оған төрден орын беріп, Арғынның Атығай-Қарауыл тайпасын басқаруға тағайындаиды. Айта кететін жایт, ол кезде қазақ тайпаларын хан тағайындаған сұлтандар басқаратын болған. Мәселең, Найманды Барак сұлтан, Керейді Ералы сұлтан (Әбілқайырдың баласы), Алтай-Қарпықты Әбілпейіз сұлтан (Әбілмәмбеттің баласы) т.б. басқарған. Міне, осы кезден бастап Абылайдың қазақ халқының тарихындағы өзгеше орны басталады.

Қазақ тарихын жырлаған барлық жыраулар мен жыршылардың шығармалары мен өлеңдерінде Абылайдың аты аталады. Өзінің тұстастары Үмбетей, Тәтіқара, Бұқар жыраулардың Абылайға арнаған талай дастандары мен жырлары бар. Абылай қазақ халқының ұранына айналған, оның рухы мен жігерін шындал, елдік пен ерлікке үндей білген ерек тұлға. Бұрын-сонды болған қазақ хандарының ішінде Абылай секілді атаққа, абырой мен данққа бөленигені кемде кем, тіпті жоқ деуге болады. Өзі қатысқан немесе қол бастаған шайқастар мен ұрыстарда ол керемет қолбасшылық да-

Абылайдың ақ үйі

рынымен, сонымен қатар жеке басының ереч ерлігімен көзге түсken. Шоқан Уәлиханов: «Полезные советы его и стратегические соображения упрочивают за ним имя мудрого. Абылай действительно перенос много испытаний и борьбы, пока значение его не возросло до того, что киргизы (қазактар Ж.С.) считали его воплатившимся духом (арвах), ниспосланным для совершения великих дел» деп жазды.

Қазақ халқының тарихын білемін деген адам алдымен Абылайдың кім екенін білуі керек. 18-ші ғасырдың басында, Абылай тарих сақнасына шыққанға дейін, жоғарыда айтқанымыздай, қазақ жері тартылған тулақтай болып, әркімнің шапқыншылығына бір ұшырап, халқы жаудан үдерे қашуды ғана біліп жүрген болса, ол билікке келгенен кейін жауына тойтарыс беріп қана қоймай, оны куып барып, өз жерінде де шапқынға ұшырата алатын мықты елге, көршілері санасатын іргелі мемлекетке айналды. Абылай билік құрған кезде жонғарлардың қазақ жеріне басып кіруі тоқтатылды. Екі халықтың арасындағы 200 жылға созылған соғыс Абылай бастаған қазақ әскерінің «Шанды жорық» аталған үлкен шайқаста жонғарлардың қалдығы торғауыт қалмақтарды (**бұлар да жонғар мемлекетін құраған тайпаларға жатады**) қирата женуімен түпкілікті аяқталды. Қытайдың қазақ жерін басып алуға жіберген басқыншы әскері де тойтарылды. Қағазға мұқият қытай елінің деректері осы соғыстан кейін әскерді бастаған екі қолбасшысын да шендерінен айырып, қатардағы сарбаз қылып жібергенін айтады. Осының өзінен-ақ қытайлардың көздеген мақсаты болмағаны, қазақ жерін күшпен бағындыра алмағанын көруге болады. Баянауылдың батыс жағындағы Ші-